

元

史

六十

子

卷

之

一

〔史四十二本納百〕

史元本明

冊 十 六

究 必 刻 翻

中華民國二十四年十二月初版

發行者

商務印書館

印刷者

上海河南路
商務印書館

發行所

上海及各埠
商務印書館

外夷傳卷第九十五

元史三百八

翰林學士知制誥修國史兼翰林待制承旨高知制誥兼國史院修撰官王楙等奉

勅

高麗

高麗本箕子所封之地又扶餘別種嘗居之其地東至新羅南至百濟皆跨大海西北度遼水接營州而靺鞨在其北其國都曰平壤城即漢樂浪郡水有出靺鞨之白山者號鴨綠江而平壤在其東南因恃以爲險後闢地益廣并古新羅百濟高句麗三國而爲一其主姓高氏自初立國至唐乾封初而國亡垂拱

以來子孫復封其地後稍能自立至五代時代主其國遷都松岳者姓王氏名建自建至肅凡二十七王歷四百餘年未始易姓入元太祖十一年契丹人金山元帥六哥等領衆九萬餘竄入其國十二年九月攻拔江東城據之十三年帝遣哈只吉劄刺等領兵征之國人洪大宣詣軍中降與哈只吉等同攻圍之高麗王名缺奉牛酒出迎王師且遣其樞密院使吏部尚書上將軍翰林學士承旨趙冲共討滅六哥劄刺與冲約爲兄弟冲請歲輸貢賦劄刺曰爾國道遠難於往來每歲可遣使十人入貢十二月劄刺移

文取兵糧送米一千斛十四年正月遣其權知閣門
祗候尹公就中書注書崔逸以結和牒文送劄刺行
營劄刺遣使報之高麗王以其侍御史朴時允爲接
伴使迎之帝又遣蒲里岱也持詔往諭之高麗王迎
拜設宴九月皇太弟國王及元帥合臣副元帥劄刺
等各以書遣宣差大使慶都忽思等十人趣其入貢
尋以方物進十五年九月大頭領官堪古苦着古歟
等復以皇太弟國王書趣之仍進方物十六年七月
有旨諭以伐女直事始奉表陳賀八月着古歟使其
國十月喜速不瓜等繼使焉十七年十月詔遣着古

歟等十二人至其國察其納款之實十八年八月宣
差山木解等十二人復以皇太弟國王書趣其貢獻
十九年二月着右歟等復使其國十二月又使焉盜
殺之于途自是連七歲絕信使矣太宗三年八月命
撒禮塔征其國國人洪福源迎降于軍得福源所率
編民千五百户旁近州郡亦有來師者撒禮塔即與
福源攻未附州郡又使阿兒禿與福源抵王京招其
主王瞰瞰遣其弟懷安公王健請和許之置京府縣
達魯花赤七十二人監之遂班師十一月元帥蒲桃
迪巨唐古等領兵至其王京瞰瞰遣使奉牛酒迎之十

二月一日復遣使勞元帥于行營明日其使人與元帥所遣人四十餘輩入王城付文牒又明日瞰遣王佖等詣撒禮塔屯所犒師四年正月帝遣使以璽書諭瞰三月瞰遣中郎將池義源錄事洪巨源金謙等賁國贐牒文送撒禮塔屯所四月瞰遣其將軍趙叔章御史薛慎等奉表入朝五月復下詔諭之六月瞰盡殺朝廷所置達魯花赤七十二人以叛遂率王京及諸州縣民竄海島洪福源集餘民保聚以俟大兵八月復遣撒禮塔領兵討之至王京南攻其剋仁城中流矢卒別將鐵哥以軍還其已降之人令福源領

之十月瞰遣其將軍金寶鼎郎中趙瑞章上表陳情
五年四月詔諭瞰悔過來朝且數其五罪自平契丹
賊殺剗刺之後未嘗遣一介赴闕罪一也命使賁訓
言省諭輒敢射回罪二也爾等謀害着古歟乃稱萬
奴民戶殺之罪三也命汝進軍仍令汝弼入朝爾敢抗
拒竄諸海島罪四也汝等民戶不拘集見數輒敢妄
奏罪五也十月瞰復遣兵攻陷已附西京等處降民
劫洪福源家六年福源得請領其降民遷居東京賜
佩金符七年命唐古與洪福源領兵征之九年拔其
龍岡咸從等十餘城十年五月其國人趙玄習李元

祐等率二千人迎降命居東京受洪福源節制且賜御前銀符使玄習等佩之以招未降民戶又李君式等十二人來降待之如玄習焉十二月噉遣其將軍金寶鼎御史宋彥琦等奉表入朝十一年五月詔徵噉入朝噉以母喪辭六月乃遣其禮賓卿盧演禮賓少卿金謙充進奉使副奉表入朝十月有旨諭噉徵其親朝於明年十二月噉遣其新安公王佺與寶鼎彥琦等百四十八人奉表入貢十二年三月又遣其右諫議大夫趙脩閣門祗候金成寶等奉表入貢五月復下詔諭之十二月噉遣其禮賓少卿宋彥琦侍御

史權驢充行李使入貢是歲攻拔昌朔等州十三年
秋瞰以族子縛爲己子入質當定宗憲宗之世歲貢
不入故自定宗二年至憲宗八年凡四命將征之凡
拔其城十有四憲宗末瞰遣其世子俛入朝世祖中統
元年三月瞰卒命俛歸國爲高麗國王以兵衛送之
仍赦其境內制曰我太祖皇帝肇開大業聖聖相承
代有鴻勲芟夷群雄奄有四海未嘗專嗜殺也凡屬
國列侯分茅錫土傳祚子孫者不啻萬里孰非向之
勍敵哉觀乎此則祖宗之法不待言而章章矣今也
普天之下未臣服者惟爾國與宋耳宋所恃者長江

而長江失險所藉者川廣而川廣不支邊戍自徹其藩籬大軍已駐乎心腹鼎魚幕燕亡在旦夕爾初世子奉幣納款束身歸朝含哀請命良可矜憫故遣歸國完復舊疆安爾田疇保爾室家弘好生之大德捐宿構之細故也用是已嘗戒敕邊將斂兵待命東方既定則將廻戈於錢塘迨餘半載乃知爾國內亂渝盟邊將復請戒嚴此何故也以謂果內亂耶權臣何不自立而立世孫以謂傳聞之誤耶世子何不之國而盤桓於境上也豈以世子之歸愆期而左右自相猜疑私憂過計而然耶重念島嶼殘民久罹塗炭窮

兵極討殆非本心且御失其道則天下狙詐咸作敵
推赤心置人腹中則反側之輩自安矣悠悠之言又
何足校申命邊閫斷自予衷無以逋逃間執政無以
飛語亂定盟惟事推誠一切勿問宜施曠蕩之恩一
新遐邇之化自尚書金仁雋以次中外枝黨官吏軍
民聖旨到日已前或有首謀內亂旅拒王師已降附
而還叛因仇讎而擅殺無所歸而背主亡命不得已
而隨衆脅從應據國人但曾犯法罪無輕重咸赦除
之世子其趣裝命駕歸國知政解仇釋憾布德施恩
緬惟瘡痍之民正在撫綏之日出彼滄溟宅於平壤

賣刀劍而買牛犢捨干戈而操耒耜凡可援濟母憚
勤勞苟富庶之有徵冀禮義之可復亟正疆界以定
民心我師不復踰限矣大號一出朕不食言復有敢
踵亂犯上者非干爾主乃亂我典刑國有常憲人得
誅之於戲世子其王矣往欽哉恭承丕訓永爲東藩
以揚我休命四月復降旨諭倂曰朕祇若天命獲承
祖宗休烈仰惟覆燾一視同仁無遐邇小大之間也
以爾歸欵既冊爲王還國今得爾與邊將之書因知
其上下之情朕甚憫焉倂求出水就陸免軍馬侵擾
還被虜及逃民皆從之詔班師乃赦其境內六月倂

遣其子永安公僖判司宰事韓即入賀即位以國王封冊
王印及虎符賜之是月又下詔撫諭之二年三月遣使入
貢四月僨入朝六月僨更名植遣其世子愷奉表以聞八
月賜植玉帶一遣侍衛將軍李里察禮部郎中高逸民
護愷還國九月植遣其侍御史張鎰奉表入謝十月帝遣
阿的迷失焦天翼持詔諭以開權塲事三年正月罷互市
諸王塔察兒請置鐵冶從之請立互市不從賜植曆後歲
以爲常植遣使入謝優詔答之四月植遣其左諫議大夫
朴倫郎將辛洪成等奉表入朝六月遣使入貢八月朴
倫等還賜西錦三段間金熟綾六段十月詔諭植籍

編民出師旅輸糧餉助軍儲是月植遣使入貢四年
二月以植不荅詔書詰其使者植表乞俟民生稍集
然後惟命帝以其辭意懇實允之朝貢物數亦命稱
其力焉自三月至于六月植凡三遣使入貢賜植羊
五百十一月植以免置驛籍民等事遣其翰林學士
韓就奉表入謝五年正月丁丑朔植遣使奉表入賀
諭還使令植親朝京師四月以西北諸王率衆款附
擬今歲朝王公群牧于上都又遣必闐赤古乙獨徵
植入朝脩世見之禮五月植遣其借國子祭酒張鎰
從古乙獨入見六月乃親朝九月帝以改中統五年

爲至元元年遣郎中路得成持赦令與植郎將康允珫頒其國十月植入朝十二月遣植還國是年春植遣使入貢自是終世祖三十一年其國入貢者凡三十有六至元三年二月立瀋州以處高麗降民帝欲通好日本以高麗與日本鄰國可爲鄉導八月遣國信使兵部侍郎黑的禮部侍郎毅弘計議官伯德孝先等使日本先至高麗諭旨十二月植遣其樞密院副使宋君斐借禮部侍郎金贊等導詔使黑的毅弘等往日本不至而還四年正月植遣君斐等奉表從黑的等入朝六月帝以植飾辭今去使徒還復遣黑的與君斐等以詔諭植委以